

Pɔl saba kaplāŋ Kolosyifa ye

Syaha fla nge

¹ Ndoo Pɔl kē, ndoo wii Yāhā ra yāŋ yi, ma ra ta Yesu Crise tēnlɛhɛ. Ndoo, ma suhu wo Yesu kāndeyārwe Timuti ne, wii me too saba nwo yrūhū nɔ wāā ye kē, ² yii mpāy tee yii le soho Yesu koho wo Kolosyi wo. Ye ma wo Yesu kāndeyārwei, ma maha n sroŋ le kānde wo. Wo Tuhufua Yāhā, ke ke laantār yar ye na tesē ke yrīŋ ne.

Syaha tesē wānar ne Kolosyifa wī na

³⁻⁴ Ye sē yāā, tee wo Yīŋfua Yesu ta ye Yater mii, tesē mpāy byɛ pe nii Yāhā nawee-, pe ntāŋ pe dye ye tāy mii, wo koo byɛ luhu. Koo kē, yalebyɛ wo ma nii ye wī pāā Yesu Crise Tuhufua Yāhā ye, wo ne syaha wāā ke kē ye wī na. ⁵ Pe le Yesu cīnde kapāyī yar ye na, kayūhū nkāy tee ga waha yāā Yāhā tāy, pe koo byɛ yar ye na ma yee, ye ga waha koho taha yaha ke na. Loo ne, ye n Yesu Crise ta ye Yater, tesē Yāhā nawee- ntāŋ n dye ye tāy. ⁶ Le Yesu kapāyī n cāāŋ driyē kur byɛ wo, nawee- busāā n nii Yesu ta pe Yater. Tee ba le kapāyī fe luhu ye fla na, le sē ba pye la koo syi dyaŋ? Loo na, ye ba Yāhā laantār wī war cīnde. ⁷ Wo tētēwe Yepafarsyi wii u ntāŋ dye wo tāy, woo kē tuu ye klaha le kapāyī wī ne. U loo pye

wo draha wo, u ma Yesu Crise tēnlēhe, u sroŋ.
 8 U wo yar ma yee, Yāhā Yrā Fānga kāmāy na,
 Yesu kāndeyārfa ntāŋ dye ye tāy.

9 Ma gbe per gii na too ye wīl luhu, yalebye wo
 n pāā Yāhā ne ye wīl na. Wo ke nar, ye yai ye naa
 ke laam wūhū nkāy pye, ke koo yar ye na. Loo
 na, ye ga laantor yāā, Yāhā Yrā Fānga kāmāy na,
 tee maha ke kai- cā. 10 Wo Yāhā nar ke ye ta, ye
 n waha naa ye troho tāhā Yīŋfua Yesu yor wo,
 tesē kai- nkāy ke n tāy u ye, ye n waha naa koo
 pye. Loo na, ye ga naa kayūhū ter bye pye; kaa
 ga maha naa n taha ye kacān na, Yāhā kue ye.
 11 Wo Yāhā nar ke ye ta ye n waha naa yii plāhā
 ke fāngayūhū kāmāy na. Loo na, ye ga waha naa
 wāfāy ter bye sya laanyīn ne, tesē nuhu ne. 12 Ye
 ga waha syaha wāā wo Tuhufua Yāhā kē nuhu
 ne. Ye sē yāā, ke ye ta ye ga waha kayūhū yāā
 ke cāā- fla wo, kayūhū nkāy ke ta yaha mpāy kē
 pe ma ke wām.

13 Wo Tuhufua Yāhā kē ke wo tyīn sya wam
 fānga koho wo, ma wo le ke Dyabua Yesu yīnfar
 yai wo. 14 Woo kē u wo sya yaha, ma wo kapee-
 laha kāā wo yīŋ na.

Yoo kē Yesu Crise ne?

15 Yesu Crise ma Yāhā yīrfua, wo woo yāā.

Yāhā koo na, waa saha ke yāā ye.

Kai- nkāy bye Yāhā ke tāhā,

Yesu Crise woo u ma ke bye yaha ye.

16 Woo kāmāy na kai- bye tāhā,

yāhāyīŋ na tesē kāntraha ne,

kai- nkāy nawee ga waha ke yāā yīnde ne,

tesē nkāy ne nawee saha ke yāā yīnde ne ye.

U fānga ter bye tãhã, yĩfar ter bye ne,
 sãndãã ter bye ne pe fānga ne.

Kai- bye tãhã woo kãmay na,
 ke maha tãhã woo kē.

¹⁷ Kai laa sē bii tãhã wa ye, woo pye.

Woo kãmay na, kai- bye ma ke wã nii na.

¹⁸ Ye cã, yĩŋ koo kē

ke ma kadye teebɛɛɛ bye yaha ye.

Koo syi dyaŋ Yesu Crise ma

u kãndeyãrfa yawãr bye yĩŋ na.

Woo kē u ke kai- bye feɓbesaha ta,

woo kē tuu cãã yir gbã wo,

ma dur ba yrãŋ na.

Loo ne, u ma yaha ye kai- bye wo.

¹⁹ Le tãy Yãhã ye,

ke n nii ke ya yar woo ya na,

u n nii Yãhã yirfua.

²⁰ Wãn tii bye te ma kãntraha na,

yãhãyĩŋ ne, tesē nawee- ter bye ne,

Yãhã yee koo ga te wãã le

ke ya ne ke Dya kãmay na.

Loo ne, Yãhã n pa yrĩŋ ne,

ke Dya ntãŋ kãmay na,

ntãŋ mpãy pe woo yaliile wo

pe ba u kuey mar boo trã na.

Yagaa, nawee- ga waha wãã le Yãhã ne.

²¹ Faale wo, ye bya ba dey Yãhã ne, ye sē ba ke cã ye. Ye pye gɛ pye ke napĩ-, ma naa kapee- ga ye laam wo, ma naa ke pye. ²² Yagaa, Yãhã ye ta ye n wãã le ke ne ke Dya gbã kãmay na, yaliile wo u pye kãntraha na, pe n ba u boo. Loo na, Yãhã ta ye ga waha crã ke na, ye laam ne pe laha, tee maha sron, kapee laa saa maha pye ye

yĩŋ na ye. ²³ Koo ngĩĩ bye ga waha pye, ye ma nii le Yesu kapāyĩĩ wũhũ sya cĩĩnde, ye ma waha yii na, ma kuee le Yesu kānde wo, ye ma nii koho taha n yaha le kapāyĩĩ kayũhũ na. Loo kapāyĩĩ nde pāā ye ye, tesē kāntrahafa bye ne, ndoo Pɔl ma le tēnlɛɛ.

Pɔl ma Yesu kāndeyārfa yawāhāfa tēnlɛɛ

²⁴ Yagaa, kadye wāfāy gii tē n sya ye wĩĩ na, n ke sya nuhu ne. N cā le ga ba laa yō ye kē. Koo wāfāy nge, u Yāhā Yĩndefua Crise ke cāā yar yaha wa, n ga koo wāfāy nge bye sya tāŋ, le n laa yō Yesu kāndeyārfa yawāhāfa kē, poo mpāy pe ma mii Yesu kadye dyaŋ. ²⁵ N nii Yesu kāndeyārfa yawāhāfa tēnlɛɛ, Yāhā ra taha loo na, ma yee n ke Yāhā kaplāŋ bye pāā tāŋ nawee-ye.

²⁶ Koo kaplāŋ ngĩĩ, Yāhā sē le yar yāā faalefa na ye, ke le yar yagaafa mpāy na pe ma ke koho wo. ²⁷ Koo kai- ngĩĩ, waa sē ke war yāā faale wo ye, ke sron yō. Ye sē yāā, le tāy Yāhā ye, ke n yee koo ga ke yar nawee- ter bye na. Koo kē ngĩĩ: Tee seefar le u Crise ne, ye ga cā ye yee, ye ga ba ye Yāhā nayōr lay yāā. ²⁸ Loo ne, wo u wĩĩ pāā nawee- ter bye ye, ma pe yar n waha le ne, ma le klaha pe ye laantor busāā ne. Mpāy pe seefar le u Crise ne, wo n ke pe laam pe plāhā u kānde wo, wo n ba pe yar u na. ²⁹ Ta tēn ne loo ne. N nii waha, ma le tē Yesu Crise fāngangbāŋ kāmāy na.

2

¹ N n traha ye cā, n n fāy cĩĩnde wāfāy Yāhā wānar ne ye wĩĩ na, tesē Yesu kāndeyārfa bye

ne Ladusye wo, tesē Yesu kāndeyārfa mpāy bye ne, pe sē ra cā yāā ye. ² N wāfāy nge sya ma yee, ye bye laam n wāflaŋ yāā Yesu kānde wo, tesē ye n seefar le yii ne, ye ntāŋ n dye yii tāy. N loo pye ma yee, ye waha laantor yāā, ye Yāhā kaplāŋ cā laha, kaplāŋ nkāy waa sē ke cā yāā ye. Koo kaplāŋ ngī u Yāhā Yīndefua Crise wī pāā. ³ Woo kē u Yāhā wūhū bye cā tāŋ, u maha ma Yāhā laantor ne. U ga waha koo bye yar ye bye na.

⁴ N kai- ngī bye yar ye na, ye ma syi waa n ba ye wlaŋ yigi u dawar kaplāntāhā ne ye. ⁵ Ta fla ke sya dey ye ne mii, ta laam poo -sē ma ye ne yalebye. Tee yii plāhā, ma kuee le Yesu kānde wo, le tāy ra ye nuhu ne.

Yesu Crise woo u ma yīŋ

⁶ Tee Yesu Crise ta ye Yater, -ye naa n yār u kānde wo, nawee- n le yāŋ cā ye na, ye seefar le u ne. ⁷ Katyigi ke ke nnen gbāā kāntraha na mii, -ye ye laam nnen gbāā Yesu na koo syi! Ye tyii Yesu n yīŋ yāā ye kānkai- bye wo! -Ye naa yii plāhā, ye naa n kuee u kur ye. Koo kai- ngī kē pe naa ye klaha. Yāhā ke ke laantār wī lii pye ye kē, ye ma n faha le na ye, -ye naa syaha wāā ke kē!

⁸ -Ye yii yigi, waa ma syi u ye wlaŋ dawar kaplāŋ ne ye! Nawee laam kaplāŋ kē koo ne, yīŋ wee ke na ye, nawee- kapī wūhū kē. U Yāhā Yīndefua Crise wī sē kē koo ngī ne ye. ⁹ Yāhā ke ya wūhū bye yar tāŋ gbaa na u Crise kāmāy na. ¹⁰ Tee seefar le u ne, ye Yāhā wūhū bye yāā tāŋ. Ye sē yāā, woo ma fāŋga ter bye yīŋ na, yīnfā ter bye ne.

¹¹ Tee seefar le u ne, ye nii mii ye kũũ. Koo yĩntaha kē Yesu Crise ye yi kãã kapee- wãpyeŋ wo. Koo kē Crise wãkũũ, naweetee wãkũũ sē kē ye. ¹² Ye sē yãã, tee tãã yi loho wo, ye le sya ma cã Yãhã fãnga kē ke Yesu Crise ta u n yir gbã wo, ma dur ba yrãŋ na gbaafa ye. Ye wãtããyi yĩntaha kē nde: Le ma mii, ye bya ba wãã le u ne gbĩ laam wo nakur, Yãhã n ye ta ye n yir gbã wo, ma dur ba yrãŋ na gbaafa ye.

¹³ Faale wo, ye pye nakur draha wo Yãhã ye, ye kapee- wãpye wĩ na. Ye sē ba ciĩnde Yãhã cã ye, ye sē maha ba kũũ Crise wãkũũ ter na ye, koo kē. Yagaa -sē na, Yãhã ye ta ye n yir poo gbã wo, ma dur ba yrãŋ na woo kãmay na, ma ye kapee- bye laha kãã ye yĩŋ na. ¹⁴ Le nii mii saba dyaŋ le yrũhũ le na ma yee, Yãhã fue ma wo na wo kapee- wãpye wĩ na. Yãhã n woo saba wĩ kua kãã wo yĩŋ na, yaliile wo Yesu Crise ku wo wĩ na trã na. ¹⁵ Yãhã u gbã ta, ma sãndãpee ter bye fãnga pye klaha- tãŋ, pe yĩnfar ne. Ke yia pe fãnga na nawee- bye yĩnde na Crise gbã kãmay na. Ke syi u nii yiafua fãnga ter bye na.

¹⁶ Loo na, ye ma syi ye naa waa kapãn luhu ye dir wĩ na, tesē wãn tii ne tee n wo ye. Ye ma syi ye naa waa kapãn luhu kapĩĩ- nkãy wĩ na, tee yai ye pye gbargbar per syi wo, yronfuẽ yĩmper ne, tesē kanii per ne ye. ¹⁷ Koo kai- ngĩ ma mii u Yãhã Yĩndefua Crise kayũhũ yĩm ya dyaŋ. Yĩm ya wee kla ye, Crise woo ge kē tuu ga waha u kayũhũ wãã ye kē.

¹⁸ Ye ma syi ye naa kawarfuafa kaplãŋ luhu ye Yesu kãnde wãyãr wĩ na ye. Ye ma syi ye yii tege tãã ye, ye naa yãhãyiŋ tẽnlehe sey poosyifa

wāŋ syi dyaŋ ye. Poo ma yāã mii wāytāã dyaŋ pe na, ma ngaa yāã, pe ga le ta kangbāy pe laam wo. Yīŋ wee ke na ye, yataŋ gboho ter pe na, naweete kacān ter ya te ma pe laam wo. ¹⁹ Pe sē Yīŋfua Yesu wīi klaha nawee- ye ye. Woo -sē kē u n ta, u kāndeyārfa yawāhāfa n gaha yahasee ye, loo le n tāy Yāhā ye. Le ma mii yīŋ wāŋ syi dyaŋ, ke ma kadye teebēhe kur bye yaha ye, ke kadye n nii n le. Ke kadye teebēhe bye gbra te ya na, sohosar fla na, tesē nnen ne.

²⁰ Nawee ma ku, u yīŋ yi kãã kapīi- wūhū wo. Tee -sē nii mii ye ku u Crise ne, le ma mii ye yi kãã kapīi- wūhū wāfāy wo. Nwa ye n maha yii le yaha kapīi- wūhū kānde wo?

²¹ Pe ma ye pye ma yee, ye ma digi nge di, kapīi ne; ye ma digi nge ter pye di yāŋ wāpyediyāŋ ya, kapīi ne; ye ma te kla nge na, kapīi ne; nwa ye n nii ke sya cīinde? ²² Nawee- kaklaha ya kē koo ne. Yīŋ wee ke na ye, ke ga ba kua kãã. ²³ Koo kapīi- wūhū pyefa, pe pe ya ta poo ma kacāŋ-, pe sē -sē wee ngaa ge ye. Pe pe kai- pye pe ya koho fānga na ma yee, poo pe ya tege tãã ye. Pe pe ya kadye ka n fāy, pe koo ngīi bye pye pe yataŋ kānde na.

3

-Ye naa Yāhā wūhū ke, koo ke ma yīŋ!

¹ Tee nii mii ye yir gbā wo, ma dur ba yrāŋ na gbaafa ye u Yāhā Yīndefua Crise ne, ye yai ye naa yāhāyīŋ wūhū koo ke. Koo fla na, Yāhā u Crise ta u n nii ke kāndigi kue ye kai- bye yīŋ na. ² Ye ma syi ye kántraha wūhū ta yahasee ye ye, -ye

Yāhā wūhū koo ta yahasee ye! ³ Ye sē yāā, le ma mii ye wee driyē nge laam wo nantāŋ ye, ye n poho Crise ne Yāhā fla na, nawee- saha loo yāā yīnde ne ye. ⁴ Yagaa, tee n poho Crise ne Yāhā tāy, per gii Yāhā ma ba u ta u n dur ba kāntraha na nawee- bye yīnde na, woo wii too n poho u ne, wo bye ga ba wāā nii u ne kai- bye yīŋ na u nayōr fla wo.

Kolosyifa faale wūhū, pe yagaa wūhū ne

⁵ Nawee ma ku, u yi kāā kapee- wāpyeŋ wo. Tee -sē nii mii ye ku Yesu Crise ne, ye tyii ye kapee- wāpyeŋ na mii tyatyāhā ter bye dyaŋ, tesē katār rii bye ne te sē yō ye, ma suhu yīnde wān bye wāke ne, tesē koho wāwahater ne wale kue ye. U wale ga nii u ye mpar wāŋ dyaŋ. ⁶ Mpāy pe kapee- ngī pye, Yāhā laam ga ba war pe ne, ke n pe pēn. ⁷ Faale wo, tee pye kapee- koho wo, ye naa koo kapee- ngī pye.

⁸ Yagaa, ye tyii kapee- ngī wāpyeŋ na mii laam wāwar dyaŋ, ncafūhū wādiŋ ne, tesē napeer ne. Ye ma syi tyehē n naa n yi ye yē wo, tyatyāhā kaplāŋ ne ye! ⁹ Ye ma syi ye kawar fua naa n taha yii na ye! Ye sē yāā, ye ye faale kapee- wāpyeŋ miy yaha, ¹⁰ ma klaha nii nafām. Ye ga naa n nii koo syi ya, ye sya ba nii mii Yāhā wāŋ syi dyaŋ, Yāhā gii ke nawee tāhā. Ke syi, ye ga ke cā cīinde.

¹¹ Ye ma Yāhā cā cīinde, loo le ma yīŋ. Ma -sē yee, ye ma Yiifēe- woo, ye wee Yiifēe- woo, ye kūū woo, ye sē kūū woo, ye ma yāmpa woo, ye wee yāmpa woo, le tāy ye ma kulaafa woo, ye ma nyēfigifa woo, yīŋ wee koo katē- ngī wī nen

laa na ye. U Yāhā Yīndefua Crise woo u ma yīŋ kai- bye wo, ye bye n poho woo kāmāy na.

¹² Ye ma Yāhā wām. Ye ntāŋ dye Yāhā tāy, ke n ye yāŋ yi, ye nii ke wām. Loo nde na, ye yai ye naa koho le yii ye, -ye naa laantār yar yii na, -ye naa yii tege tãã ye, -ye ta ye wĩ naa n tãy nawee-ye, -ye naa nii laanyĩn ya ne! ¹³ -Ye naa n nii pra yii ne, ye nampyeŋ wii ma laa tee pye ye na, ye yai ye tyii le kapee fue na ye kuāŋ ne. Ye yai ye naa n tyii ye kapee- foho na yii kē, mii Crise tyii ye kapee- foho na u kuāŋ ne mii. ¹⁴ Lii le ma yīŋ, ye tyii ye ntāŋ n dye yii tāy, loo ga ye ta ye n sron wã le.

¹⁵ Crise tuu yrīŋ mpāy wãã ye kē, ye tyii poo wĩ n naa n nii ye laam wo, -ye n naa ye troho tãhã loo kãnde na yalebye! Ye ma nii koo syi, ye bye ga naa n nii yĩmbui nen na, yii mpāy tee ma Yesu kãndeyārfa. -Ye naa syaha wãã Yāhā kē kai- bye na! ¹⁶ Ye tyii u Crise kapān n nii gbãã ye laam wo, le cĩinde wũhũ bye ne. Loo na, ye yai ye laantor yãã, -ye naa yii klaha le Crise kapān ne, -tee naa yii laam too kai- na! -Ye naa syaha wãã Yāhā kē, -ye naa yay le nuhu ne ke kē! -Ye naa koo ngĩ pye Yāhā wāsey yay ne, tesē Yesu kãndeyārfa yay taa ne, ma suhu yay taa ne tii Yāhā te le ye laam wo.

¹⁷ Kaplāŋ nkāy bye tee ga naa n pãã, -ye naa ke pãã Yīŋfua Yesu miyũhũ n yi le na. Tesē, kai- nkāy bye tee ga naa n pye, -ye naa ke pye u miyũhũ n yi le na! Yāhā ke ke laantār wĩ lii pye ye kē, ye ma n faha le na ye, -ye naa syaha wãã ke kē Yīŋfua Yesu kāmāy na!

Yesu kãndeyãrfa pe nampyeŋ- ne

¹⁸ Цoo, yĩnfar wãã ma puai kē, taa naa n luhu u ye! Loo ne le sron Yesu kãnde na. ¹⁹ Puai, tyii ma цoo ntãŋ n dye ma tãy, ma'a syi ma ma laam waha ter u ne ye.

²⁰ Kicar, -ye naa n luhu ye seefa ye kai- bye wo! Loo ne le yõ Yesu kãnde na. ²¹ Seefa, ye ma syi ye laam n waha ter ye pii ne ye! Mii loo sē ne ye, pe ga waha yee, pe wĩ sē n tãy ye ye ye.

²² Tēntē-, -ye naa n luhu ye yĩnfa ye kai- bye wo, kãntraha nge na. Pe yĩnde ma ye na woo, pe yĩnde wee ye na ye woo, -ye naa pe wĩ pye yalebye! Ye ma syi ye yee, ye ga naa pe wĩ pye, ye wĩ n tãy pe ye loo wĩ na ye. Tee n ke ye wĩ n naa n tãy Yĩnfua Yesu ye, -ye naa ye yĩnfa wĩ pye laanyõm ne. ²³ Le ma pye tēn lii tēn lii, -ye le tē yõ nuhu ne! Ye sē yãã, ye le tē Yĩnfua Yesu kē, ye sē le tē naweete kē ye. ²⁴ -Ye ye laam too nde na: Yãhã kayũhũ nkãy ta yaha ke nawee- kē, Yĩnfua Yesu Crise ga ba ye dãã ke ne. Ye sē yãã, ye tēn tē woo kē. ²⁵ Wii tuu -sē kapee- pye, Yãhã ga ba u pēn u kapee- wĩ na. Yãhã -sē nge, le tãy ma ma nangbãŋ woo, ma ma nafla woo, nawee- bye ma wãcɛŋ ke yahasee ye.

4

¹ Yii mpãy tee ma yĩnfa, -ye naa n sron ye tēntē- ne, -ye pe yigi naa n yõ! -Ye ye laam too nde na: Ye bya, ye Yĩnfua ma yãhãyĩŋ na, wii tee yai ye naa n luhu u ye.

Pɔl Kolosyifa yar kai- ne

² -Ye naa n pãã Yãhã ne yalebye! Ye ma syi ye naa n faha loo ne ye! -Ye naa syaha wãã Yãhã kē, ke laantār wūhū nkāy wīi na ke n pye ye kē.

³ -Ye naa Yãhã nar ta bya wīi na, ta n waha nii yãã, n naa u Yãhã Yīndefua Crise cīinde wīi yar nawee- na, cīinde wīi lii pe sē le cã yãã ye. Ye sē yãã, loo cīinde nde wīi ne tē ma nwompihi wo.

⁴ N taha loo cīinde nde wãpãã na. -Ye Yãhã nar ta n waha le pãã laha nawee- ye.

⁵ Mpãy pe wee Yesu kãndeyãrfa ye, -ye naa ye troho tãhã pe ne laantor ne. Ye ma kãhã yãã tee ga waha Yesu wīi pãã pe ye, -ye naa le pye. ⁶ -Ye naa kaplâyūhū pãã pe ne, laantor ne! Wii ma ye yey lii ne, -ye ufua klaha cīinde ne!

U saba kuasaha fla, syaha ne

⁷ Kai- nkāy ke ma ra wūhū, Tesyihi wii u ma wo Yesu kãndeyãrwebua, u n gaha naa ke tōr ye ye. U ma ra tēntēwe Yesu tēn na; u koho le ra ye. ⁸ N u lehε wãã ye ye, u ga wo wūhū pãã ye ye, tuu ye ta ye n waha laanyīn yãã. ⁹ Pe ma pe syām ye klofua Wonasyimu ne. U bya ma wo Yesu kãndeyãrwebua, u sron le kãnde wo. Poo pe syām, pe n gaha ye yar kai- nkāy bye ne, ke n pye wo fla na nwo.

¹⁰ Arisarkε wii u ma nwompihi wo ra ne, u ye syar, woo tesē Barnabaase cīifua Mareke ne. N ba u Mareke wīi cãã pãã wa ye ye. U ma ba ka ye fla na, -ye u yigi yō! ¹¹ Yesu wii pe n yee Yituse, u bya ye syar. Poo naam tãã mii ya me pe ma Yiifee-, ma Yesu kãnde yār, ma nii tēn tē ra ne Yãhã Yai myaha na. Pe wīi nuhu le ra laam wo, ma maha ra laam yīn.

¹² Yepafarsyi wii u bya n yi ye klo wo, u bya ye syar. U ma Yesu Crise tēntēle. Yalebye u Yāhā nar ye wīi na cīinde wānar, ma yee ke wāle laantor wāā ye kē Yāhā wūhū kuε ye, ye n ke laam wūhū cā, ye naa ke pye. ¹³ -Ye yāŋ, n cā ye wīi sron gboho Yepafarsyi laam wo cīinde, yii Kolosyifa, tesē Ladusyefa bya ne, tesē Yeraploisyifa ne. ¹⁴ Wo naambiyābua Luke wii u ma dohotar, woo tesē Demasu ne, pe ye syar. ¹⁵ -Ye Ladusyε Yesu kāndeyārfa syar, -ye Nehēfaa syar, woo tesē Yesu kāndeyārfa mpāy ne, pe pe ya wāā u kaha wo. ¹⁶ Ye ma ba saba nwo kal tāŋ wa ye yawāhāfa bye ye, ye ta pe n u kal Ladusyε Yesu kāndeyārfa yawāhāfa bya ye. Saba wii tē -sē yrūhū wāā Ladusyefa ye, pe ma u nō wāā ye kē, -ye u kal yii ndoŋ! ¹⁷ -Ye Arisyipe yar, pe u taha Yīŋfua Yesu tēn lii na, u le tē yō!

¹⁸ Kaplāŋ nkāy ke ga taha yagaa, ndoo gε kē tē ke yrūhū ta koho ne: Ndoos Pōl, n ye syar. N ma nwompihi wo, ye ma n faha le ne ye. Yāhā ke ke laantār wūhū pye ye bye kē.

YĀHĀ NAAMBIYĀRFĀN SABA
Karaboro, Eastern: YĀHĀ NAAMBIYĀRFĀN SABA
New Testament

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

15120496-00e2-503a-8d40-2d7cfdc1ba5b